

մանաւանդ՝ որ եկեղեցականութիւնը զինուորութիւն է, մանաւանդ Սրբոց Յակոբեանց Միաբանութեան անդամներուն համար:

Ներկայիս Հայաստանեայց Առաքելական Եկեղեցոյ ամենէն անհրաժեշտ պայմաններէն մէկն է ունենալ Պօղոս Առաքելի նամակներուն ոգիովը տոգորուած հրամայել գիտցող եպիսկոպոսներ, Եկեղեցոյ աւանդութեանց նախանձախնդիր կղերականներ՝ որոնք ի պահանջել հարկին Աստուծոյ սուրբ Տունէն, Քրիստոսի նման զիտնան դուրս հանել կեղծաւորներն ու մերօրեայ փարիսեցիները:

Սակայն ասոնց կարգին մեր Առաքելական Եկեղեցին ամէն ժամանակէ աւելի կարիքը ունի իրենց գերադասներուն հնազանդիլ գիտցող զարգացած եկեղեցականներու՝ կուսակրօն թէ ամուսնացեալ, որոնք անձնուէր կերպով ծառայեն իրենց Եկեղեցոյ եւ ժողովուրդին, որոնք ըլլան անփոխարինելի գործակիցներ իրենց մեծաւորներուն, ինչպէս նաեւ բարի օրինակ հաւատացեալ ժողովուրդին:

Զարգացում, համեստութիւն եւ քաղաքավարութիւն ցանկալի բարենիշերն են Հայ հոգեւորականին, սակայն անոնցմէ աւելի պահանջուած գլխաւոր յատկութիւնն է **ՀԱՒԱՏՔԸ, ՊԱՐՏԱՃԱՆԱԶՈՒԹԻՒՆ** ու **ԿԱՐԳԱՊԱՀՈՒԹԻՒՆ**, ինչ աստիճանի վրայ ալ ըլլայ տուեալ եկեղեցականը:

Միոն 1931

Տ.Վ.

## Ամենապատիւ Պատրիարք Սրբազան Հօր Անդրանիկ Պաշտօնական Մուտքը Բեթղեհէմ

Երկուշաբթի, 17 Յունիս 2013, առաւօտեան ժամը 9:45-ին, նորընտիր Հայոց Պատրիարքը՝ Ամենապատիւ Տ. Նուրհան Արք. Մանուկեան, Սրբոց Յակոբեանց Միաբանութեան անդամներուն հետ ուղղուեցաւ դէպի Բեթղեհէմ Մուրբ Ծննդեան Տաճար, հոն կատարելու նորընտիր Պատրիարքի տաճարէն ներս, համաձայն Սթաթուքոյի, պաշտօնական անդրանիկ մուտքը:

Պատրիարք Սրբազան Հօր եւ միաբանութեան ինքնաշարժներուն ընկերակցեցան Երուսաղէմի ոստիկանութեան մեքենաները՝ դէպի Բեթղեհէմ ճանապարհը ազատ պահելու եւ առաջնորդելու այս շքեղ երթը:

Ինքնաշարժներու թափօրը ընթացաւ աւանդական ուղիէն հասնելով Բեթղեհէմի գլխաւոր հրապարակը: Հոն կը սպասէին Բեթղեհէմի Կառավարիչը, Բեթղեհէմի եւ Պեթճալայի Քաղաքապետները եւ Հայոց Գաղութի երեւելիները: Ժամը 10:15-ին, Պատրիարք Սրբազան Հօր ինքնաշարժը հասաւ Բեթղեհէմի գլխաւոր հրապարակը, ուր եւ ողջագուրուեցաւ Պաղեստինեան Պետութեան վերոյիշեալ անձերուն հետ, ու միասնաբար, միաբանութիւն եւ ժառանգաւոր սաներ թափօր կազմած՝ «Խորհուրդ Մեծ» շարականի երգակցութեամբ ուղղուեցան դէպի Տաճարի սինագարդ գաւիթը: Տաճարի մուտքին, Սրբազան Պատրիարք Հայրը ողջագուրուեցաւ Յունաց Պատրիարքի եւ Ֆրանչիսկեան Քուսթոսի ներկայացուցիչներուն հետ, եւ թափօրը ընթացաւ դէպի տաճարի սինագարդ գաւիթը: Պատրիարք Սրբազան Հայրը, շուրջառով եւ գաւազան ի ձեռին եւ ժառանգաւոր

սաներու «Հրաշափառ»-ի երգակցութեամբ, առաջնորդուեցաւ դէպի Ծննդեան Այրը՝ խնկարկելու եւ իր անդրանիկ ուխտը կատարելու: Խնկարկման եւ անդրանիկ ուխտի կատարումէն վերջ, Պատրիարք Սրբազան Հայրը կարդաց մեր Տիրոջ Յիսուսի Քրիստոսի հրաշալի ծնունդը դրուատող աւետարանէն գլուխ մը, իսկ ժառանգաւոր սաներ երգեցին «Փառք ի բարձունս Աստուծոյ» գեղեցիկ փառերգութիւնը: Աւետարանի ընթերցումէն ետք, Պատրիարք Սրբազան Հայրը առաջնորդուեցաւ դէպի Հայոց Բաժնի Եկեղեցին, Աւագ Խորանին առաջ, ու հոն «Ուրախ եղէ եւ ոյք ասէին ցիս ի տուն Տեառն երթիցուք մեք» սաղմոսը կարդաց: Սաղմոսի ընթերցումէն ետք, Պատրիարք Սրբազան Հայրը «Պահպանիչ»ով օրհնեց բովանդակ միաբանութիւնն ու ժողովուրդը: Պատրիարք Սրբազան Հօր օրհնութենէն ետք, բոլոր ներկաները առաջնորդուեցան դէպի Բեթղեհեմի Հայոց Վանուց ներքնասրահը ուր պատրաստուած էր հիւրասիրութիւն մը այս շքեղ առիթով: Նախքան հիւրասիրութիւնը, խօսք առաւ Բեթղեհեմի Հայոց Վանուց Տեսուչ՝ Հոգ. Տ. Խաղ Վրդ. Ճունտուրեան, շնորհաւորելով Պատրիարք Սրբազան Հայրը այս առիթով եւ հայցեց անոր Սուրբ Հոգւոյ առաջնորդութիւնը իր առաքելութեան մէջ: Հայոց Տեսուչի խօսքէն ետք, խօսք առին Բեթղեհեմի Կառավարիչն ու Քաղաքապետը, որոնք եւս շնորհաւորութիւններ եւ բարի մաղթանքներ ըրին Պատրիարք Սրբազան Հօր անդրանիկ մուտքին այս առիթով: Ապա խօսք առաւ Պատրիարք Սրբազան Հայրը, եւ շնորհակալութիւն յայտնեց Պաղեստինեան Պետութեան Նախագահին եւ անոր ներկայացուցիչներուն, որոնք եկած էին սոյն հանդիսութեան, եւ հայցեց Աստուծմէ, որ խաղաղութիւն շնորհէ Պաղեստինեան չարչարեալ ժողովուրդին եւ պետութեան:

Հիւրասիրութենէն ետք, Պատրիարք Սրբազան Հայրը միաբանութեամբ հանդերձ վերադարձաւ Սրբոց Յակոբեանց Մայրավանք:

